

# Nama Reti Pengidup?

## BAGI KE EMPAT

---

### Tanya #3: Kini Ka Penunga Kitai Enti Uдах Mati?

---

#### **A. Bakani kitai deka nemu, nama utai ti deka nyadi apin kitai mati?**

Pengasai ati kitai, nyangka pengidup ba dunya tu enda likun, tang nama penyadi enti kitai udah mati? Bakani ka nasib enti seput kitai udah abis?

Mayuh orang agi kakang ati, nama pengujong enti udah mati, enda nemu kini ka penunga enti tubuh udah lela. Mayuh kitai takut ka pemat, tang pemat tu endang selalu entudi kitai ari belakang, enda ulih di seliah ka kitai. Laban kitai mensia endang enda tau enda mati. Ambi ka banding;

- i. Kadang kitai ngasai ka diri empu bisi penyakit (kanser, jantung, darah tinggi) udah dipadah ka lutor enda ulih obat. Tu meh siti tanda pemat udah semak kitai. Nadai siku mensia tau idup belama iya ba dunya tu.
- ii. Orang ka jai diukum bunuh, laban sida udah munuh orang tauka bejwal dadah. Tang kitai tu mega taja enda munuh orang, enda nyual dadah pan kena ukum mati, laban kitai endang bedosa enda taluk ka ajar enggau pesan TUHAN (**Rome 6:23**). Upah dosa enti kitai enda arap ka Jesus (nadai pengasih Allah Taala) ianya pemat. Bakani enti kitai ti enda arap tau ulih nyeliah ka pemat belama iya? Semina nengah pengidup ka udah diberi ulih Tuhan Jesus aja. “*Sengat (pemedis) pemat nya dosa, lalu kuasa dosa datai ari Adat*” (**1 Korint 15:56**). Adat ka dititih ari peturun aki ini kitai, ulih sida ti enda ngelala TUHAN ti bendar enggau TUHAN ti idup, nya ti mai pemat.
- iii. Timpuh deka datai! Semina kitai enda nemu maya. Pemat tu enda ulih dikelari, ngasuh ati semua kitai takut, laban enda nemu nama utai ti deka nyadi sebedau kitai mati. Sebedau kitai mati, kada enda kitai nya nat ka pemerinsa kini ka naka pemedis? Mati ngenyit? Bebadi ba jalai patah kaki jari kini? Tauka mati tindok enggau mayuh agi chara kitai tau mati, nadai siku kitai nemu. Penusah ka datai ari TUHAN mai pengidup, tang penusah ka datai ari dunya mai pemat (**2 Korint 7:10**).
- iv. Kadang-kadang kitai selalu gut-gut, ketegal laban penguji ti enda ulih di seliah. Tang utai ti bakanya dikena TUHAN ngasuh kitai nyadi menyana awak ka tau ‘matang’ dalam runding enggau chukop bepenemu, (**1 Korint 10:13**).

#### **B. Kini penunga kitai udah mati?**

Ditu kitai sama berati ka pasal pengidup ba dunya tu, semina Bup Kudus aja ti terang madah ka penunga pengidup kitai udah mati. Mayuh kitai ka bedau nemu Kristus, agi arap ka utai ka ditusoi aki ini kitai menya pasal dunya pemat. Tang utai bakanya nadai bebatang (nadai bukti) ti tau dikarap.

- i. Bup Kudus madah ka utai ti nyadi udah kitai mati. Kitai mati sekali aja, udah nya dipechara di mua TUHAN, (**Hebrew 9:27**). Jesus deka datai udah tauka apin kitai mati tubuh. Pemanah enggau penyai kitai deka ditemu udah kitai dipechara ba mua TUHAN. Iya deka nentu ka dini endur alai kitai patut di-engkah - neraka tauka serega,

## Nama Reti Pengidup?

(John 5:28-29). Sapa ti ngasi ka ajar enggau pesan TUHAN, deka bulih penyamai, sapa ti ngelaban deka diberi anggor pemuras TUHAN (**Pemandang 14:9b-13**).

- ii. Tiap iko kitai mensia deka dipechara di mua Kristus. Maya nya Iya madah ka tiap iti pengawa manah enggau jai ka udah dikereja kitai lebu idup ba dunya tu. (**2 Korint 5:10**).
- iii. Maya hari pechara, Anak Mensia deka nentu ka sapa ti lurus enggau ti jai. Kitai deka dibagi ngagai dua bengkah raban, iya nya bedus (orang ti manah) enggau kambin (orang ti jai). (**Matt. 25:31-46**). Bala bedus (sida ti nangi enggau ngasi ka pesan Kristus) ka muak ari kanan deka bulih perintah ti udah disemaya ka TUHAN, (**baris 34-40**). Tang bala kambin (sida ti enda arap sereta ngereja penyai) ka muak ari kiba deka di ukum masuk neraka, (**baris 41-46a**).
- iv. **Bakani kitai tau nemu nama upah ka diterima kitai?** Ari kitai ti ulih nitih ka ajar enggau pesan TUHAN. Sapa ti ngereja pemadas deka tulih ka pengidup ti meruan. Sapa ti nadai pengelurus deka tulih ka pengeringat TUHAN. <sup>6</sup>*Laban Allah Taala deka ngupah genap iku orang nitih ka gaya pengawa ti udah dikereja iya.* <sup>7</sup>*Ngagai sida ti seruran ngereja utai ti badas, ngiga mulia, basa enggau utai ti enda ngerusak, IYA deka meri sida pengidup ti meruan belama iya.* <sup>8</sup>*Pengeringat enggau pemuras IYA deka ninggang orang ti amu (ngiga penguntung ka diri empu), nulak (enda arap ka) pemendar sereta nitih pengawa ti jai.* <sup>9</sup>*Pemerinsa enggau pemedis deka di asai ka genap iku orang ti ngereja penyai, terubah ngagai bansa Judah, udah nya bansa bukai.* <sup>10</sup>*Tang Allah Taala deka meri mulia, basa enggau pemaik ngagai semua orang ti ngereja pemadas, terubah ngagai bansa Judah udah nya ngagai bansa bukai.* <sup>11</sup>*Laban Allah Taala enda bebagi ati.* (**Rome 2:6-11**).

### C. Nama kebuah agi kakang?

- i. Mayuh kitai agi kakang ati, enda arap ka Jesus ti nyadi Hakim lebuh maya hari pecahara. Bakani kitai tau nemu utai tu endang amat nyadi? Bakani kitai tau nemu kitai tu endang amat di-idup ka baru ari mati? Kitai mensia ti udah mati dibanding ka enggau leka utai. (**1 Korint 15:35-44**).
- ii. Nyadi kitai sama udah nemu nama penyadi udah kitai mati. Siku orang (Jesus) ka udah mati, lalu Iya udah madah ka nya ngagai kitai, (**Kereja Rasul 17:30,31**). Dalam **1 Korint 15:1-4**, Paul nerang ka nama reti Berita Manah ka enda tau enda dipegai kitai. Berita Manah pasal pengangkat kitai ari mati, lalu nama gaya pengidup kitai udah mati. Bakani gaya tubuh kitai udah mati, lalu bakani kitai tau di-idup ka baru ari mati, peda; (**1 Korint 15:42-54**). Kristus empu udah mati ketegal dosa kitai, Iya empu mega udah ngasai ka pemat, lalu di angkat ka idup baru. Iya udah mandang ka ngagai kitai, ba dunya tu kitai semina mati tubuh, tang roh kitai mengkang idup lalu enda tau mati agi. Tang dalam pengidup roh, kitai agi ulih ngasai ka pemedis enggau penyamai. Reti tu kitai ulih ngasai ka pemedis enti di palu, ditunu tauka diperinsa. Bakanya mega roh kitai ti idup ulih ngasai ka penyamai enggau pengelantang. (**bacha semua 1 Korint bagi 15**).

## Nama Reti Pengidup?

- iii. Nama gaya pendiaui enti kitai udah mati lalu di angkat ka idup baru? (**Matt 22:30-32**). Kitai mensia baka melikat di serega, nadai jadi melaki bini. Laban TUHAN kitai TUHAN ti idup.
- iv. Kati ko kitai tau arap ka utai ka ditusoi dalam Bup Kudus tu endang amat? Bup Kudus nusoi sapa Jesus tu ti bendar, (**John 5:39**). Ba Sempekat Lama Moses udah ngenang sapa Jesus tu ti bendar (**John 5:46**), nyengkaum sekeda nabi ka bukai (e.g. Isaiah, Jeremiah, Daniel, Mikah). Jaku TUHAN ka ditulis dalam Bup Kudus, endang beguna bendar dikena ngelala penyalah enggau pengelurus, (**2 Timoti 3:16,17**). Laban semua jaku ka ditulis dalam Bup Kudus endang datai ari pesan Allah Taala, ukai peneka ati digaga mensia, (**2 Peter 1:20-21**).

**Udah abis tu peda BAGI KE LIMA – Pengawa Ti Patut Dikereja**